



重建隄門橋記

嘉興郡當水陸之衝一水奔駛而西滙于崇德界者曰西運河去北折迤而東以達吳江者曰北運河邑秀水所治也聞隋大業間闢自京口疏至餘杭白樂天所謂平河七百里沃野兩三州者可徵我朝因之以通漕運厥利溥哉平陸沿堤比下支分派別或滙霅川或過語溪或八震澤大則輿梁小則徒杠在在攸濟去城西南若干許有鎮曰隄門士民環居而運河臨右道傍有一川北注界

大和堂 卷之六  
絕通途宋泰定間作橋其上以通往來歲久朽泐  
行者苦之宣城劉君景之丞邑也以時循行過而  
歎曰吾職在水利可使此橋終于不治乎歸告邑  
長進士周君懋文是之丞得郡檄將委于附鎮之  
氓周君曰毋爲是也乃布令曰義本人情願施者  
聽於是者民義士相率樂從各出私篋權材鳩工  
悉復橋之舊而石堅工良規制益闢以固經始于  
正德某年月日而某月日落其成功不役民財匪  
公帑而樂施者爭先恐後猗然而橋成行旅往來  
居然不知衆感躍稱頌願書其績請予記之嗟夫  
先王體國經野而其微至于道樹川梁莫不有政  
教存焉昔孔明相蜀橋梁道路靡不修治君子以  
爲幾于先王之政子產相鄭以其乘輿濟人溱洧  
君子譏之今二君雅不動民而卒成利涉之計一  
宜書之凡天下之事成于同而敗于異故同寅協  
恭著于虞書若二君可謂同而協者二宜書之歷  
世久遠橋有時而泐也又附其工石之顛末并尚  
義者之姓名于碑陰俾嗣君爲政者益思所以不

大和堂 卷之六  
隳三宜書之系之銘曰隄門之墟有川浩浩川有  
古橋界彼孔道歲久而傾材斃弗興賢哉令丞謀  
臧績成周行履坦人不病涉我思古人王政罔缺  
民曰我侯惟周惟劉殫力共事惠我永休祝侯千  
年與橋同壽橋也或隳我侯不朽樹石勒文以告  
後來視侯之績尚無隳哉

鄂陽山葬記

成化二十一年乙巳六月二日先考封奉政大夫  
竹軒府君卒于正寢時勳爲南京大理丞聞訃悲  
號幾絕易服遂行旣至四日成服苦塊餘息形死  
心存前一年爲甲辰勳以刑部郎中承乏南來得  
便道歸省庭訓之餘先考嘗曰乍浦雅山聞有一  
穴堪塋塋者乘生氣也當擇其所相避其所害近  
世惑于陰陽禍福之說而久停求利者悖理傷義  
爲甚他日不諱宜慎擇之凡汝兄弟宜各自擇毋

混瀆以失尊卑汝其識之勳拜命惟謹泣不忍聞夫何抵官未數月而凶問至矣是歲冬乃走書新安延至謝君子期子期如期而來至則同舟冒雪南自雅山歷覽而東至鄂陽山之地子期曰此吉壤也若雅山名之曰獨曰石皆不可葬也此脈其來甚遠堪輿家所謂金水之形穴居其窩負已向亥兼于乾巽明堂寬正河水橫欄左有陽山官山之拱衛右有高公龍尾之護纏長山陳山並峙于後雅山獨山互列于前皆自然凝結非架空鑿出其言有據未行前一夕勳忽夢有一大刹塑佛皆白身無金裝一人在旁曰此佛未出頭也旣寤而心異之又以明日方相地而得此夢吉凶未可知今觸日間忽見金刹巋然當前因拉子期不百步而至則見刹中諸佛皆素宛然夢中景也不覺嗟歎久之乃知人之生順死安固有定數而冥冥之中已先兆于夢寐間矣翼日三卜習吉無異爰用厚直償其地主余姓者而子期經營位處剪伐荒翳子期前指後畫考極相方繩直版縮規正高下

不踰時而諸美畢見所謂龍穴砂水者已得其槩  
爲基百畝有奇周圍羅城五十餘丈石垣三百餘  
丈中豎華表首翼享堂左右牲庫所碑亭坊牌石  
器以次而列爲楹凡三十餘間松柏隨宜布植至  
丙午三月之望始克安葬而壙域虛右堆土掩覆  
勳服闋獨奉慈闈有終養之志先妣宜人訓之曰  
古有以離愛爲樂者子知之乎我有汝妹汝弟在  
郡城當就養于彼汝毋以我爲念也勳旣奉訓就  
祿于朝荷蒙 聖恩隆洽遷轉不次弘治辛亥擢

大理左少卿甲寅右副都御史整飭邊務巡撫京  
畿丙辰妻宜人林氏卒于遵化行院喪歸而子期  
再至乃爲相其鄂陽之西偏有隙地亦余姓者復  
售而有之卜其宅兆而安厝之是歲夏改刑部侍  
郎贈先考如勳官通議大夫妣陸氏封太淑人妻  
林氏贈淑人已未奉 勅差遣河間勘訟時先妣  
年八十有九八月一日卒于郡城新第正寢未聞  
訃前數夕殊覺心動晨有鷓鴣鳴于院簷俄而凶  
問突至垂死而復甦者屢朝夕爲位設奠抱恨終

天乃知山崩鐘應亦其理也遂乞守制而 詔報  
未許遑遑在疚銜哀畢事持服得 請而還蓋太  
淑人先妣相距先考之沒十有五年其年子期復  
至乃于十二月二十二日啟先府君兆域而合葬  
焉例得 賜祭與塋葬所治封築器數之等頗加  
于舊仍首扁其門坊曰賜塋山蓋侈 天恩昭世  
德也乃置田百畝以奉祭祀西建房數間有僧焚  
掃東亦數楹傭者治業及河則樹門道門者守之  
山後置有山地碎茅給用河北有土墩名曰照墩  
高丈許聽栽松柏四外從墩百餘皆舊有者也穴  
前左右開水環繞相合出河此謂之蝦鬚合襟亦  
陰陽家所貴者河東西去二十丈許置石橋二座  
以通往來動竊以古者塋無定所惟以山厚水深  
爲善先考塋踰三十年先妣合窆十有七年艸木  
蒼鬱土色光潤五患四惡之所不犯亦可爲生氣  
所乘之驗今先考進贈資政大夫刑部尚書先妣  
贈夫人幸賴 三朝厚恩以迄于今誠祖宗福澤  
所致也追念先考治命不敢違悖凡我兄弟宜各

大和堂 卷之六  
別營幽宅以卒先志毋事僭越以傷風水以混尊卑以蹈不孝之罪其塋修築祀事俱付嫡長子孫世守勳故詳其年月始末以告來者使知成之艱守之不易也其敬慎之哉

行狀

贈承德郎刑部主事洪公封太安人姚氏行狀

承德公諱薪字汝林別號澹菴其先江西樂平之洪巖人系出忠宣公後忠宣四世孫其益宋寶慶中爲浙東安撫大使卒塋上虞之後山子孫因家焉安撫五世孫榮甫通經術負才器 國初膺茂材薦至南京無幾以疾卒于邸寓卽公之祖也父武昌號芸軒博通經史爲邑名儒因痛父以客死

遂隱居教授不仕里有不良誣以姓名犯國年號  
訟于官械送京師 太祖高皇帝廷鞠謂姓洪名  
武昌于國號何諱且洪武昌盛亦國之慶兆也  
賜字曰有恆令還鄉以備 召用抵誣者罪芸軒  
歸慕錢塘山水之勝而西溪土田尤肥沃因徙家  
于溪之招德里卒塋其處所著有芸軒集若干卷  
藏于家公兄弟三人長曰穆次曰蕪皆隱德弗耀  
次卽公公生而美丰姿瞻才藝能詩善真艸書中  
懷坦夷卓越豪邁不治資業時有負貸者輒焚券  
弗問故鄉人呼之爲落魄生嘗痛父早世不遂祿  
養乃繪風木圖乞名公卿題咏盈帙因族夫役繁  
躬執里正事于官時縣尹陸樞原見而奇之試以  
詩句及商論時務應對無遺遂強辟爲椽陸蓋由  
才幹進故其一時從事者皆求巨室賢子弟以充  
公旣就辟一心奉公當事惟謹陸器重之每公暇  
輒召與賡詩論文情若師友歲滿赴京循資授徽  
州府梅口批驗所大使日與郡邑二庠師生往還  
觴咏旣久不衰俸祿之入甚薄遇四方文人墨客

至必館穀而贖餞雖傾囊弗顧也歷三載考績于  
京適有故交陸文中者董軍需費直不能償官督  
且急公乃罄其裝而給之陸始得竣事以歸亦不  
責其報其復任也里有某者以貿易抵徽病毀骨  
立昇至公欲托爲寓臧獲懼其有染公曰彼來投  
我我可卻耶亟命移入親爲醫禱病卒以愈仍厚  
餽送還其義于故舊也多類此在任幾九年一日  
與客飲飲訖就俗忽感風未移時而卒天順癸未  
八月七日也徽之士夫聞訃哀奠皆曰磊落如洪  
公而位不盡其才壽不滿其德天胡爲哉歸橐蕭  
然惟圖書數卷而已以次年八月七日塋于祖塋  
之次距其生永樂癸巳六月三日也春秋五十有  
一配安人姚氏同邑萬石長孟庸之女秦州司訓  
仲昂姪也自幼端莊淑惠穎敏天成閑女工通女  
戒諸書爲父母所鍾愛年若干擇歸承德公奉姑  
嫜處妯娌咸得其道承德公履歷官途爲廉官爲  
義士內助居多公旣卒安人歸公喪哀毀塋祭不  
踰于禮歲時享薦必誠敬嘗謂其長子鍾曰汝父

存時見汝聰明過人每喜謂人曰人皆積金以遺子孫吾惟教子以一經耳每得當代名公文稿必親手錄以爲汝式又嘗私語汝曰吾家自安撫公以來累世積德然未有顯發者雖吾祖與父大負才美而不獲見用吾亦偃蹇若是所以顯發而昌大門戶者尚有望于爾曹也汝能記之乎鍾拜泣受命惟謹用是大肆問學領成化戊子鄉薦第登二甲第二名進士授刑部江西司主事進員外郎綽有聲譽爲一時公卿所敬重主事秩滿一考例

得封贈父母遂蒙

恩贈父如其官封母爲太

安人先是安人就養京師餘六載鍾每暮歸必問所治事當否爲憂喜識者謂有平反之意鍾之成名亦本于母教然也成化壬寅歲安人日有桑梓之念乃貽書命次子鎡自錢塘來于是秋八月扶侍以歸逾四月竟以疾卒是爲臘月廿又九日詎其生永樂丙申十月廿又六日也春秋六十又七識者又謂其能先知死生之理而得首丘之義云子男三長子卽鍾次錫蚤卒次卽鎡亦集舉子業

女三長適孫晉卒次適同里萬石長蔣貴次適餘  
杭邑庠生滕雷孫男二女二俱幼鐘歸將卜以是  
年某月日啟承德公之兆而合葬焉竊惟公與安  
人內外相承皆有善懿可稱而源流之深長慶澤  
之未艾有足書者勳忝通家畧聞世系謹掇爲行  
狀而託立言君子圖其不朽焉

明故奉議大夫刑部郎中奚君行狀

君諱昊字邪享姓奚氏干東子其別號也世爲華  
亭人曾祖興一樂閒先生祖文華樂耕先生皆隱  
德弗耀以詩書相承著于家牒所居南橋里後徙  
城東明星橋而家焉至父盛文茂先生始以明經  
授霸州同知終於四川合州有文翁之風以君貴  
贈承德郎刑部主事母梁氏封太安人有賢行君  
行六生而質貌穎秀光采射人爲父母所鍾愛方  
九齡卽知向學一日執束修詣社中就業遇一婦

人于途悲泣不已問之則曰家貧有舅姑鬻綿得百錢而遺諸市無以爲饘粥具君卽以束修白金與之歸語承德公公曰此麥舟遺意也吾有後矣蓋君雖在童卯而其向慕已不凡如此年甫志學耽嗜文籍習舉業屬筆有奇思承德公病革君終夕侍側湯藥必嘗而後進復刺血籲天請以身代太安人憐之君匿不使聞公卒扶柩奉母匍匐萬里東歸廬墓終喪有過人行君有三兄曰元曰冕曰昂元昂皆蚤世昂權厝于合而力不能歸君每念首丘之義輒泣下數行曰吾力能爲必歸塋先塋而後已尤努力進修以顯揚爲志太安人欲析貲以助其需君從容辭謝曰兄冕勞于幹蠱立門戶幸悉與之母太安人如其言故雖一絲之微必出自兄手蓋君雖未壯年而諳練世故艱難孤苦之遭處之固裕如也性尚冲澹不樂市塵囂紛寓居城東明心寺博通經史益汪洋自肆時提學御史陳公選藻鑑精明試君文而奇之卽遣入郡庠應戊子南畿鄉試一舉上第計偕春官連登成化

已丑進士觀政刑部雖得意中而白雲之念不替  
昕夕疏乞省視 詔許之君歸拜慈展墓之餘遇  
其族姻疏戚閭巷長老恂恂謙溫不敢忘桑梓之  
恭敬忽父兄之交遊鄉人稱其忠厚越四年成化  
壬辰授刑部貴州司主事政務大體不爲細家之  
迫促然處事詳諦吏法精敏而發奸擿伏片言刃  
解績用茂著三載秩滿封贈如例 制詞有勤慎  
舉職之褒十三年丁酉遷署本司員外郎不替於  
初十四年戊戌冬會貴州畢節衛武人林姓者構  
訟連及臺諫事大獄重必在得人簡君以往君驅  
馳萬里觸冒風霜嵐瘴有不暇恤旣至鞠治引伏  
官吏除名釋活者殆數百人邊情大快還奏稱  
旨十五年己亥遷浙江司郎中十六年庚子夏以  
母老在堂援例疏乞歸省 詔復許之其忠厚之  
道益孚于宗于鄉明年辛丑夏迎太安人來京就  
養不數月會江右瑞州豪民毛姓者結黨與協殺  
仇家其禍至慘株連所及甚衆而有司久不以  
上聞至是始露 詔求老成刑官追逮君遂得

旨以往比至按訊決死獄數十人元克渠魁籍其田產奴其子女入官而有司稽緩不治者論罪有差俾積年之寃一朝而雪事竣還至錢塘以勤勞太過得疾而卒乃壬寅三月十五也距所生丁卯年某月日享年三十六娶潘氏封安人子一曰伸九歲女四皆未行君素好學雖鑠金之暑折膠之寒手不釋卷興至則臨寫晉漢書帖退筆盈几所著有千東子集若干卷藏于家且好義樂交有無不卹歲得俸絹之入必以分歸族屬率以爲常爲員外時有同年友董敦仁尹姚江以非罪地走京師遇寇于途囊且罄落魄無依君爲館穀製衣纊以禦寒而歸塗所助其費尤多景州有獲仕判官劉福緣者承德公舊僚也停柩五年不能舉君爲舉之其寡妻孤子德君之淡至沒齒不敢忘故君之卒錢塘也舊僚友李君若虛適爲浙江提學憲副左方伯劉君廷信輩亦素重君日臨視湯藥不少懈比將卒執君之手謂曰君豈止于此哉君泣下惟言不能盡忠報國母老子幼而已言訖而卒

二公爲之經紀喪事甚悉航櫬以歸安于正寢訃聞縉紳驚悼未幾其女兒之夫孫鏞始來挈其家口而還將以某年月日塋于先塋之次初君之爲主事員外也與勳爲同司識君頗深君平居恭慎自持畧無矜大之容而遇事剛正不阿殆有不可犯之色所居號退食窩杜門終日庭戶之間草積不剪不妄交接亦不爲俗吏之爲而雅好良朋至則賦詩觴咏相與劇談當世之務珠連玉貫或至夜分未嘗有倦怠夫其孝友之行于家也忠厚之信于鄉也清勤之著于官也信誼之洽于友也而又有文以華之有器以充之淵淵乎其志不可以涯也侃侃乎其節不可以撓也若是者宜其遠大而乃官止于大夫年不及下壽上有望八之母下惟九齡之子其故何哉予悲之而又有感焉人才之生自古爲難不數十年間無以成一人不數百人中無以得一人間而得一二焉顧又不幸蚤死無以觀其終則勳于君之死雖欲不悲且慟不可得已勳聞訃之明日往拜慰其母太安人于堂道

其遺行歷歷可稽俾勳狀之雖言之不文幸無愧  
辭敢托立言君子而芟摭焉

墓誌

勅封順天府推官前廣東清遠縣儒學訓導  
林公偕配贈安人洪氏墓誌銘

公姓林氏諱耀字彌宣以字行號遲菴世家蒲田  
東前埭唐名臣蘊藻後曾大父性初大父洪永樂  
庚辰進士官至儋州同知父潛夫母王氏繼龔氏  
林族鉅貴盛如殿元綱齋公學士澹菴公以聲華  
侈大門戶子孫皆克自砥礪公幼失恃在族從號  
爲守禮甫弱冠父卽世凡儀文葬具一依文公家

禮歲時薦享極其誠敬友兄弟極其愛事繼母龔極其孝龔所出幼弟欲分異諭以理察弗可奪泣而均之弟所得有不如意者易以已之完好恐傷龔心龔疾甚當灸先灼艾已以試之龔忽心動不艾而疾愈人謂公孝心所感性夷坦不設城府遇人無大小一以至誠鄉久敬之愛之在邑庠處朋友言必以義有切磋之益公所居地分挈雜沓乃絕遠塵鞅卧起環翠樓俯而讀仰而思爲文章益有奇思造詣日深義理精到同輩推讓以數奇連

上有司弗利困挫摧折業益不倦乙卯歲有司貢于天子試殿廷優等乃授廣東清遠訓導居官五年教人有法多所成就丁龔憂歸囊蕭然諸生贖以五十金爲葬具悉辭不受其配洪安人先公卒已弗逮祿矣安人諱錦字仲淑世居山屏亦闕閱舊望大父鎮梧州教授父則榮母徐安人自幼聰慧爲父母鍾愛不以與凡子擇所宜歸而歸于公安人通書史執婦道勤女紅所以奉姑嫜處妯娌相夫子教子及孫者悉有其道以故公之靜專

勤學皆安人婉意襄順以成其志也蒙養諸孫書  
爲正句讀列侍夜讀朗誦通遍始聽就枕今大理  
評事富在諸孫最長尤鍾愛然不少假借磨礪積  
習以成進士人謂安人之宜其家人皆公身帥刑  
化之被也里有陳伯同與公善歸其女粧奩羞澁  
安人脫珠環可百金假之竟不責其償其重義不  
嗇施類如此公生于宣德壬子十一月十三日卒  
于正德元年正月初五日享年七十有五洪氏安  
人後公五日而生二十年而卒成化乙未十月十  
日也享年五十有五子男二長曰垠封評事次日曰  
塾登弘治壬戌進士授順天府推官女二長適黃  
大資次適方紳郡庠生孫男三長卽富與塾同年  
進士次宓宏孫女四曾孫一萬仞孫女二公以子  
塾貴封如其官母洪贈安人公卒後爲正德四年  
塾聞公捐館爲位于京兆第哭甚哀評事富亦以  
祖訃卽而朝夕哭乃以其同邑戶部郎中三渠陳  
述所爲狀乞銘于予予嘗賓節推君爲西席謝非  
其人不獲命則謹按狀而爲之銘銘曰林洪著姓

以嫁以婚外治內順厥家以潤厥教所成有子有  
孫初公積學累試不利司訓貽謀由教以致封  
贈天錫哀榮後先同藏永賁我銘斯鐫

明故中順大夫山東按察司副使致仕晉階  
亞中大夫張公墓誌銘

正德壬申三月二日致仕山東憲副華亭張公卒  
年六十有九卜以其年十一月二日葬秀野北高  
原先塋之次將啟莊孺人之封而附焉前事之月  
其子應魁應乾泣血走書以太學生談田所爲狀  
介妹夫秀水令蘓君從仁乞銘于予曰先君遺命  
託爲銘不肖嗣病不能跣請云云予旣與公同朝  
久且善知公爲素銘其奚辭公諱縉字廷肅其先

永嘉人元季曾大父諱斌避兵吳中遂家松之南  
橋周道鄉篤實踐行隱晦不華厥配陳氏貞淑自  
宜以爲世軌大父怡閒業專耕讀紹德惟克家益  
饒裕配吳氏巨族孝稱舅姑父遺菴理行洽于鄉  
評而不一試于用自號遺菴以公貴贈文林郎監  
察御史母朱氏得婦道母慈之譽 封太孺人公

生七八年卽嗜學問語必驚人不煩提諭稍長益  
騫卓然有成甫志學遊邑庠博學多識文思絕出  
精采煥發每試高等提學嚴公稱之曰廟堂才也

錄爲諸生式丁酉歲發解南畿辛丑登進士第公  
風儀玉立色夷氣清可畏而親冢宰尹公一見奇  
之選授大行人成化間履捧 詔江南故事有迎

私覲之禮公一切辭謝嘗至松一拜遺菴于膝下  
外雖公宴固請不可時學士錢公東海張公咸詩  
賢之 朝廷以公不辱而廉方將使海外而遺菴  
訃音適至矣公卽日南旋讀禮卒喪仍職如故甫  
三載銓曹選授御史公自誓忠勤靡懈故在 孝  
宗朝謇諤任直聲問彌彰嘗監盧溝商稅再監崇

文宣課二稅在輦轂之下治之維艱公持廉秉公官商兩便會兩廣邊儲多弊且耗勅公往蒞清盤公至按法精明不苛不縱邊儲已完考績書最拜勅有使蕃方而克宣德意清邊廩而益著賢勞之褒公之忠勤動天此足槩見未幾太倉被水京城多盜欲得彈壓風力不避權勢者爲之朝論舉公公執憲不阿有言南新倉就圯公奏新之記文刻石其大者應詔陳言切中時弊首劾中貴人不法數事衆皆爲公危卒置于法人謂公積誠所感維時屬江右多故責重巡按衆謂公老成廉幹者宜莫如公上亦知公親承簡命倍道而南駢駢靡及施爲得體百度維貞歲大比公盡心覃力得士居多舉黜臧否諸司畏服嘗作錦江橋于瑞州人無病涉司寇盱江何公有記郡守華亭陳公有頌皆勒石可徵公之初至首捕袁州巨盜遷蕃府于蜀皆其力量大端其他可畧也事竣還朝丁母憂卒喪簡任河南道河南司考察比屬值考京官公正光明雅望益大賜勅有剛方廉

慎之稱臺評有有爲無悍之譽公時維兩考而官  
幾九載矣燕薊沿邊一帶時被建州三衛出沒抄  
掠兵農失業公以資望當調膺 命璽書拜山東  
按察副使以行公爲整飭邊備料理屯田軍民相  
慶鼓舞顧積勞成疾而抗章請老 孝宗皇帝不  
欲重違恬退特允致仕公時年六十餘精神完好  
未屆致仕之期士夫因艷其行而措其用急流勇  
退殆神仙中人不可挽而留者道聞季子應隆登  
辛酉鄉薦因別號良菴以寓知止之義抵家野服  
蕭然葛巾鳩杖足跡不入城府初家華亭邑南厭  
塵囂改今秀野卽公易簣地也公居官廉介晚益  
治生別墅園池花竹修然每與曹定菴諸公爲逸  
老會賦詩酌酒不減耆英洛社故事公善吟咏多  
不存稿惟奏議雜著數卷藏于家公凡再娶莊氏  
繼金氏 贈封皆孺人子男四長應元早卒次應  
魁例授千戶勤而克肖又次卽應隆博學瞻文卒  
于南雍官舍公哭之慟以從孫承繼皆莊出又其  
次乃應乾側室謝氏出穎慧和易稱其佳兒早游

郡庠例貢太學有志士也溪培厚發其在茲乎女  
一適秀水令蘓君從仁從仁清勤廉幹才望蔚然  
識者又謂公之善擇壻云孫餘尚幼公生于正統  
甲子十月廿有一日自筮仕迨請老幾三十年今  
上皇帝登極遇 恩例進階亞中大夫腰金生花  
章服有煒又六年而正寢焉可謂令德考終者已  
宜有銘銘曰張爲著姓自越遷吳匿德厚植篤生  
大夫猗歟大夫侃侃枉史不矯不隨直聲盈耳  
帝曰汝良尸我邊疆軍民按堵萬夫之慶積勞思

逸

優詔許之名韜實茂君子與之謂其歸之早

而卒以老壽不百齡胡不師保云有後人我銘斯  
考

祭文

祭同年張尚綱亞卿文

惟公太康華裔岷州誕生少小穎異崎嶇變更辛  
勤力學甲科 恩榮初官秋署耿介馳聲平反甚  
衆法律專精賑卹畿甸薄賦蠲征全活實多惠洽  
波氓超遷理寺讞獄持平薦陟都憲爲 國干城  
除奸革暴威德並行式佐司寇允協輿情于公陰  
德臯陶明清景仰先哲公其老成卧病請告給驛  
歸程有 詔遙來 簡在 聖明云何一一豎倏夢

兩楹漫期八座曷不百齡天奪良弼士失儀型雖  
然公有令子足繼科名公有懿行太史鐫銘生  
封死葬天道足徵某等同朝之誼薄奠薦誠公其  
有知庶幾來歆嗚呼哀哉尚饗

祭太子太保項公文

惟公乾坤間氣光嶽儲精筮仕郎署中歷變更被  
留虜塞旋歸神京桓桓大節人曰蘓卿超陟外  
臺在在馳聲臨事不回守道堅貞外峻嚴武內秉  
純誠赫赫有命允宜中丞授鉞臨戎隱然長城  
名握臺印綱紀載清石城失律帝曰汝懲整師  
百萬總督西征坐困巢穴不專戮刑子房謀幄韓  
范甲兵繼有殘孽猖獗襄荆公仍總督行權守經  
殲厥渠魁蘓復疲氓蕭何餉計武侯屯耕獻俘條

數著有章程 帝曰汝嘉喜溢 天庭位加八座  
恩賜百朋功高獲誦白璧青蠅浩然解組寵辱不  
驚公之進退繫國重輕姦邪敗露 國典彰明復  
還舊物 勅賜褒旌三十餘年洛社耆英壽躋耄  
耄一夕弗與山頽木壞朝失老成訃聞 宁悼諡  
贈頻仍有司治塋鬱鬱佳塋嗚呼已矣仰止曷勝  
因知爲公爲卿不足爲公榮而忠肝義膽凜凜乎  
其如生將爲雨露以配流行爲雷爲霆以泄其不  
平抑豈爲慶雲爲景星爲鳳爲麟以昭乎文明抑  
爲聖爲賢爲明神以顯乎英靈典刑如在叩之冥  
冥勳忝葭戚涕淚交橫緘辭致奠庶幾來歆嗚呼  
哀哉尚饗

祭何尚書文

惟靈廣昌茂族奕世簪纓敷歷中外綽著休聲桓  
桓大節冰蘖其清官臻八座欽恤惟刑抗疏歸休  
足不入城累章弗起終始完名聲色貨利淡無所  
嬰窮經立言晚極純精誠士之模範國之老成古  
人其人式觀儀刑免爲描畫慕歐公之早謝人各  
有志嘅文潞之復仕而其歸休著文有趙槩之清  
芬容膝易安無綠野之奇觀蓋萃衆美于厥躬非  
可一德而形容勳等晚生末屬沐德有年雖音問

之屢違而魂夢之周旋云何一疾遽爾沉綿執紼  
無由有涕潺湲薄奠寄誠靈其鑒焉嗚呼哀哉尚  
饗

祭嘉興府知府徐公文

惟公魁梧岐嶷慷愷大志高步濶視睥睨時世胸  
藏萬卷雅好詩字下筆千言沛乎無滯初登甲科  
拜官主事尋陟副郎綽有才譽迺超大郡明敏愷  
悌七邑謳歌號曰循吏在郡八載境內大治積勞  
致疾力乞休致清風高節古人伊嗣旣歸金谿倘  
徉山水詩酒陶陶其樂無涖云胡一疾溘然長逝  
臨絕之音得正而斃嗚呼懷柏山人早閒居士而  
竟至此耶公以大才而官止二千石公以盛德而

大和堂 卷之六 望  
壽未及七十位不滿才壽不滿德公有四子季爲  
御史不于其身福祿未艾勳託交最契聞訃揮涕  
四十年來如一夢寐薄莫寓誠情曷能已嗚呼哀  
哉尚饗

祭南京周尚書文

惟公之生應松嶽之降神惟公之身作 昭代之  
甫申何才美之若斯復福澤之無垠彼天地之生  
物得靈光而爲人其稟受之厚薄有萬殊而莫均  
或此與而彼奪蓋寡利而多迤公所得于天賦獨  
邁越乎等倫珠生玄圃玉產崑崙旣所植之特異  
復所養之全純一奮巍科立登要津執丹筆于粉  
署式五聽于頑嚚忽超遷以凌躡貳八座于秋旻  
繼踐都臺白簡朱輪總財賦于東南肅風紀于來

旬遂進位司寇秉五刑之天鈞巍乎柱石偉矣經  
綸梁棟爲大廈之用珪璋實清廟之珍方濟川之  
倚楫遽引退而乞身 帝愍勞以官職人仰望其  
清塵開秣陵之綠野傾北海之芳樽有子克肖共  
承華勳曳履青宮給事黃門公之樂其何極實無  
愧乎竇桂之映靈椿也夫何梁木遽頽往事漸陳  
忽厭世以歸盡驚歲事之在辰訃聞廊廟傷動縉  
紳厪 重瞳之俯念致賜贈之駢臻蓋公歷事凡  
五 朝德則表儀乎宇宙享年幾八十貴則位極  
乎人臣備哀榮于生死秉慶祐于仍雲凡天下之  
所可欲者公皆得之矣而又何愧乎樂天以知命  
逍遙以返真也耶勳等辱在交遊執紼無因傷故  
老之淪謝惟臨風而沾巾潔絮酒以遙奠籍椒桂  
之芳辛敬陳詞以致哀庶交誼其聊伸嗚呼哀哉  
尚饗

祭張尚綱都憲乃尊文

惟公遁跡丘園佩仁服義秉心古愿好善樂施不  
立町畦坦然平易不尚紛華渾然天粹詩酒高情  
山林雅志篤生賢郎爲國偉器甲科登庸刑曹歷  
試載陟中郎揚芬棘寺超拜中丞洞達邊事爰錫  
封誥褒推所自金章繡服吏隱兼遂 馳恩再三  
陝石無二皓首輝光感激 天賜期耄方將哲人  
伊瘁衣冠已矣士夫興喟訃聞 朝廷禮隆塋諡  
生榮死哀公其無愧勳等夙欽義方允懷風致限

九和堂 卷之六  
以官守徒增涕泗薄奠致辭永訣茲意嗚呼哀哉  
尚饗

祭堂兄朝列大夫三二先生并嫂封宜人陸氏文

惟我伯兄重厚貞誠問學淵邃渾然天成惟務力  
于道義初何心于顯榮數屈場屋僅歌鹿鳴節推  
武昌理獄詳明兩遷別駕藉甚聲名矢心三字勤  
慎而清一僕自隨人有徽稱曰三二先生勳之與  
兄相較七歲雪案螢牕朝競夕勵博涉羣書游心  
六藝三十年前兩同大比三十而後南北殊地緘  
書德音經時一至兄晚乞身湛恩汪被勳亦歸

休桑梓隨侍鷗盟鴈行雅願斯遂嗟我伯嫂名門  
克配婉婉令儀婦道全備關雎列傳頗諳大義初  
兄未仕勤儉荆布暨仕顯榮寒素如故貴而能貧  
獨理家務教成二子前後登第一叅藩佐一任法  
吏固父訓之嚴亦母慈所致推 封宜人 龍章  
寵錫金帶紫袍珠翟霞帔每遇誕辰勸酬稱賀魚  
羔割鮮親朋滿坐天真至樂歲凡六度夫何癸酉  
宜人謝世甫未踰時兄亦長逝聞訃痛切五內崩  
裂問醫屬續我心恒缺哀哀仲子歸養悲咽匍匐  
冢嗣還自東浙朝夕哭臨煢煢在疚勳等敬薦庶  
羞跪奠旨酒念老景之無依慨蒼旻之莫扣光陰  
幾何窀穸在邇雙旌搖搖室堂尺咫典型如在靈  
乎不起嗚呼哀哉尚饗

屠康僖公文集卷之六 終

附錄

墓誌銘

楊一清撰

公姓屠氏勳名元勳字也別號東湖生正統丙寅  
正月十日卒以正德丙子十月四日壽七十一在  
憲廟朝舉成化乙酉鄉薦己丑第進士授工部主  
事改刑部歷員外郎郎中遷南京大理丞在 孝  
廟朝拜大理左少卿擢都察院右副都御史巡撫  
順天永平整飭薊州諸路邊備遷刑部右侍郎進  
左侍郎歸守內艱服闋改左副都御史復刑部左

侍郎滿九載擢右都御史今 皇上嗣位改元特  
拜刑部尚書階資政大夫 賜玉帶麒麟服屢引  
疾求退慰留至再請益堅乃加太子太保致仕  
賜勅給驛以歸月給官廩四石歲給輿隸數如之  
至是訃聞 朝廷追錄舊績 贈太保 諭祭五  
壇而凡葬事則命 工部官飭有司治之始終恩  
禮可謂備矣公初爲工部分司清江浦督造運舟  
才譽已著三原王端懿公方總河事與督漕憲臣  
交章薦之謂可重用爲刑部敏于聽斷無滯案留  
獄尚書劉公季聰甚倚信焉每獄有疑及事干涉  
貴近莫適爲處者以屬之公無不協服京城亡賴  
子季勝誘其主之子福爲私鑄而陰結訶事者發  
之將利其產獄成福坐戍邊衆知其冤噤莫敢問  
公爲直其事以福之罪罪勝而歸其產又有林都  
事者素有依附挾以構訟蟠引不可破公廉得其  
實論如法雖爲所誣訐然卒從公議他如勘事吉  
安辨獄大同皆犁然當人心執法名益起在大理  
上十事多見 采納漳寇煽亂 勅公撫處至則

申嚴禁令諭以禍福梟其首惡脅從釋不究一方帖然其爲巡撫以近畿役重民貧京邑尤甚疏請裁省夫役昌平密邇山陵供億浩穰疏停牧馬以示優卹寶坻白龍港產銀魚歲取供薦中使因之橫索民不能堪公疏言其狀詔戒約取魚者麻峪山有銀礦守臣以中旨索之公又上疏極言其不可事止不行其經畧邊備奏分薊州三路屯兵緩急相援於潮河川築捨城設險居守及增置黃花鎮營堡戍兵聲勢聯絡虜不敢輕犯至今賴焉又奏徒熊兒峪馬營於便地就水泉人免病暍猪圈頭關沮洳多水患歲苦修築亦奏徙之南北水峪歲省役卒數百人其爲刑侍會戚畹與河間民構田訟公奉旨覈勘卒歸其田于民且言食祿之家不言利况母后誕毓之鄉而與細民爭尺寸之利尤非所宜孝廟嘉納爲刑書首上郊祀籍田幸學三事援據經傳傳以時事而歸其本于正心講學謂初服新政莫急于此宜求實意勿徒循故事爲美觀又以宋儒真西山大學衍

義爲正心講學之要乞常以進講中外傳誦之時  
望方隆屬逆瑾用事諸司奏事多先諷關白公以  
爲難始浩然有歸志矣瑾內銜之而莫之加害僅  
聽其去去閱三載瑾敗伏誅向之蟻附而干進者  
多不免公獨不爲所污蠟身名俱榮又閱八年而  
卒公少穎慧記誦絕人比成童已學貫經史操筆  
爲文多警語屢更劇曹恒手不釋卷詞章之名播  
中外然志存用世餘若不屑意者行義著于鄉評  
若辨家廟昭穆嚴禰塋之分置義田義塾以厚宗  
黨皆敦本善俗事屠先世出嘉興海鹽後析平湖  
子孫遂爲平湖人高祖亨一曾祖澤民有令德不  
仕祖湘考機俱以公貴贈資政大夫刑部尚書祖  
妣楊氏妣陸氏俱贈夫人配陳氏贈夫人以子應  
塤官加贈一品夫人繼林氏贈淑人牛氏封夫人  
亦以子加封一品夫人次室楊氏男六人長卽應  
塤正德辛未進士授禮部主事改兵部清謹奉職  
滿考得 推恩進公階榮祿大夫次應坤舉丙子  
順天鄉試次應圻應坊應竣皆國子生季曰應埏

女三長適嘉興所千戶項鏞次許適國子生黃鳳  
儀次百戶鄧欽男孫一女孫三應墳聞訃解官歸  
將以卒之明年閏十二月二日偕諸子葬公邑鄂  
陽山之原道鎮江持少詹顧公所著狀謁予請銘  
予曩官外制與公爲文字交議論多合居常過從  
必有倡和後雖羈于官守而歲時寒暄未始不相  
通公謝政予亦養痾歸江南過予道舊故慰藉拳  
拳比予再起再歸方欲候公而九原不作矣言念  
疇昔誌銘之請烏可辭銘曰

窮經學古

士則宜然

或滯于用

匪才之全

公少有志

無書不讀

視天下事

皆在我腹

旣奮厥奇

周旋曹司

析紛舉劇

無試不宜

引經折獄

以儒飾吏

發爲詞章

乃其餘事

昔在孝宗

賢俊彙征

公名日起

與位俱升

建節東巡

方畧圖上

翼翼重關

屹成巨障

億萬畿民

賴公底綏

問其疾苦

卹其寒饑

入掌邦禁

刑暴詰慝

何幽不宣

何滯不達

初服三事

皇覽曰俞

致君堯舜

惟爾嘉謨

祈天我志

祥刑爾職

慎爾三尺

長我王國

大姦竊柄

毒流九圍

公有先見

不蹈危機

少行老歸

公不待老

其身雖隱

其德彌邵

彼造而顛

公退而安

絜短較長

公何憾焉

公惠在人

公名在史

公澤在子

其流無涖

神道碑

靳貴撰

正德丙子冬十有四日太子太保刑部尚書致仕  
 平湖屠公卒于家訃聞朝廷命有司瑩葬事  
 賜諭祭贈官蓋錄其舊績也壽七十一明年閏  
 十二月二日塋鄂陽山之原子應墳既請遂菴楊  
 公銘墓復請予文表于道應墳予禮部所舉士且  
 公名臣其奚忍辭公諱勳字元勳別號東湖先世  
 嘉興海鹽人後徙平湖子孫遂為平湖人高祖亨  
 一曾祖澤民晦德弗仕祖湘考機俱以公貴贈資

政大夫刑部尚書祖妣楊氏妣陸氏俱贈夫人配  
陳氏贈夫人以子應垣官加贈一品夫人繼林氏  
贈淑人牛氏封夫人亦加一品夫人子男六人長  
應垣以兵部主事滿考 推恩進公階榮祿大夫  
次應坤貢士次應圻應坊應埏皆國子生季曰應  
埏應垣應坤應坊應埏皆次室楊氏出應圻林夫  
人出應埏牛夫人出女三人俱適名族孫男若干  
孫女若干公舉成化己丑進士授工部主事分司  
清江浦督造運舟公廉有能聲三原王端懿公適  
總河事與督運憲臣交薦謂可大用改刑部歷員  
外郎郎中所處皆劇曹剖決如流無滯枉每獄有  
疑及事干權貴者尚書林公寄聰皆屬之公罔不  
協服京城無藉子季勝誘其主之子福爲私鑄而  
陰令訶事者發其事福坐戍邊衆知其冤莫敢問  
公曰此奴利主之產也爲直其事以福罪罪勝而  
歸其產又有林都事者素挾有依附構訟蟠引不  
可解公覈得實雖爲所誣訐然卒論如法直聲益  
起甲辰遷南京大理丞弘治辛丑進大理左少卿

上十事若暑月疏決罪囚兩京一體五歲一遣官  
審錄州郡刑獄多見 采納而方石謝公起用亦

自公發之漳寇扇亂 勅公撫處至則諭以禍福

誅其首惡黨與悉不治時夏苦旱訖事雨閩人稱

之甲寅擢都察院右副都御史整飭薊州諸路邊

備巡撫順天永平以近畿役重民貧京邑尤甚疏

請裁省夫役昌平密邇 山陵供億浩繁疏停牧

馬以示優卹其經畧邊備奏分薊州密雲建昌三

路屯兵緩急相援于潮河川築捨城虎落設險居

守及增置黃花鎮營堡戍兵聲勢聯絡虜自是不

敢輕犯又奏徙熊兒峪馬營于便地就水泉人免

病暍猪圈頭關多水患歲苦修築亦奏徙之南北

水峪歲省役卒數百人寶坻產銀魚中使歲取供

薦因之橫索民不能堪麻姑山有銀礦守臣以

中旨索之公皆疏言其不可 詔戒約中使而礦

事卒不行丁巳遷刑部右侍郎尋進左會戚畹與

河間民構田訟公奉 旨覈勘上言食祿之家不

言利况 母后誕毓之鄉而與小民爭尺寸地臣

以爲不可 孝廟嘉納卒歸其田于民內艱服闋  
改左副都御史復刑部左侍郎九載考績擢右都  
御史今 皇上嗣位改元首上 郊祀藉田幸學  
三事且以正心講學爲本謂初服 新政宜求實  
意勿徒循故事爲美觀又請日以真西山大學衍  
義進講中外傳誦之丁卯拜刑部尚書 賜玉帶  
麒麟服時逆瑾用事諸司先諷關白而後奏 聞  
公執不從曰若是不惟三尺法可以喜怒高下亦  
且無 朝廷矣瑾銜之公引疾水去 上留至再

請益力加太子太保致仕

賜勅給驛歸未幾瑾

敗伏誅又八年公卒嗚呼出處君子之大節也公  
致仕時年未六十而浩然請歸所謂以道事君不  
可則止者公蓋有焉不賢而能之乎公性穎敏甫  
成童時已學貫經史有重名嘗曰士當無書不讀  
雖屢更劇曹恒手不釋卷尤善詩歌倡和皆一時  
名公其行義鄉評尤重若辨家廟昭穆置義田義  
塾皆可爲世法其諸細行以誌于墓譜于家乘不  
著特著其出處大節與論建功績有關於天下國

家者亦公之志也銘曰

詩歌明哲

維哲保身

易戒之能

維亢斯屯

終始之節

自古難全

我儀圖之

公也則賢

公進以文

清時大科

詩其餘事

令譽亦多

始官于工

勤敏惟謹

繼遷刑官

厥心彌盡

望日以起

位日以升

民有司命

國有老成

自南自北

隨地而重

或寺或臺

維時所用

晚拜秋卿

有錫輝煌

公也感遇

報亦靡

飭吏以儒

以吏則良

恤刑以仁

維刑之祥

元氣在國

陰功在天

赫赫司寇

四海具瞻

彼奸何人

怙寵肆毒

憂違浩歸

浮雲爵祿

公雖勇退

其樂則饒

彼奸既誅

公名益高

公有餘慶

有子是食

濟美承休

光我王國

生有令名

死有卹恩

匪公徼福

維 天子明 凡公行藏 百世之則

峩峩豐碑 過者其式

人物志

賢達

黃洪憲總裁 李 培掌修

夫士離蔬屨而策亨衢如繁星麗天聲光易顯  
秀邑故多先達大較清標有遠畧為上媵修苦  
節次之瑕不揜瑜又次之簪筆者羅非一日要  
之以鄉譽為準志賢達

屠勳字元勳籍平湖後居秀水成化己丑進士授  
工部主事改刑部歷員外郎中凡諸司大獄多付  
之鞠讞能精明法律稱詳允僚友咸服之己遷南

大理寺寺丞進大理寺左少卿請差官審錄革  
煩例已陞都察院右副都御史巡撫順天永平整  
飭薊州諸路兵備嘗奏分三路屯兵使緩急相援  
又增置黃花鎮營堡寶坻歲供銀魚中使因之橫  
索勦疏請約束之又奏罷麻峪山採礦民甚稱便  
已遷刑部右侍郎尋轉左會河間戚畹與民訟田  
勦勘曰母后誕育其鄉而與細民爭尺寸土大非  
國體卒歸田于民已丁母憂服闋改左副都御史  
尋陞右都御史正德改元陞刑部尚書未幾乞休  
加太子太保致仕卒賜祭葬謚康僖贈太保子應  
埏副使應坤叅政應埏諭德自有傳而應埏之子  
孟玄封吏部主事仲律御史叔方御史孫謙提學  
副使蒙大壯皆舉鄉進士

### 文苑

余邑人文權輿自漢嚴夫子蜚聲梁苑而兩中  
大夫以文學議論雄擅西京如麟遊鳳翥千載  
猶旦暮也敬輿公臣不以文概自唐而後嘒嘒  
晨星宮諭符卿登壇建鼓其余擗朽磨鈍皆當

一割余表其最著者若而人志文苑

屠應竣字文升康僖公季子自平湖徙郡城竣方舞勺康僖與論說史傳語半令懸斷成敗若素習者長而貫綜百家聲籍甚嘉靖乙酉舉應天鄉試第二明年成進士選翰林庶吉士會時宰曠諸翰林不附已出爲部寺而竣得刑部主事戊子典江西鄉試程義冠絕一時調禮部尋改翰林修撰遷侍讀進宮諭竣爲文善凡事屬辭陳誼類情縱橫子史經傳而宗本子長詩法泛濶百家意有獨詣卽明公大家無不傾下之後移疾歸未幾卒所著有蘭暉堂集

宦蹟

吾邑前哲懿伐甲視中原大者持斧斷經國是小亦能抱盈尺牘讞伏決疑聲猶藉藉焉間有鉅卿絕跡竹帛可書而或不能晚蓋然終不以一菁拊也志宦蹟

屠仲律字宗豫應竣之仲子嘉靖庚戌進士初令弋陽聲藉甚擢南臺風裁凜然已遷廬州守視身

清約時軍興浩費更以景府之國郡邑騷然仲律  
一意節省費減他郡十之五歲大祲民多逋稅爲  
出贖緩代償又出積穀數十萬平糶與民所全活  
甚衆其他興學育才銳意風教士民信愛之竟以  
勞瘁歿于官仲律倜儻有大度事母孝伯兄食貧  
歲倡仲行叔方叔章諸弟捐金助之宗黨故人多  
受惠者至今頌其德不衰

